

Հայկական վիրտուալ գիտական գրադարան

ՀՀ գիտությունների ազգային ակադեմիայում տեղի է ունեցել «Հայկական վիրտուալ գիտական գրադարան» ծրագրի շնորհանդեսը, որն իրականություն է դարձել ՀՀ կրթության եւ գիտության նախարար Արմեն Աշոտյանի աջակցությամբ: Բացելով միջոցառումը՝ ՀՀ ԳԱԱ նախագահ Ռադիկ Մարտիրոսյանը կարեւորել է Հայկական վիրտուալ գիտական գրադարանի ստեղծման նշանակությունը եւ նշել, որ այն «մեկ պատուհանի» սկզբունքով հնարավորություն կտա հայ գիտնականներին առցանց օգտվել համաշխարհային գիտական ամսագրերից ու շտեմարաններից:

ՀՀ ԿԳՆ Գիտության պետական կոմիտեի նախագահ Սամվել Հարությունյանը, ԿԳ նախարար Արմեն Աշոտյանի անունից ողջունելով մասնակիցներին, նշել է, որ համաշխարհային գիտական գրականության հասանելիությունն այսօր հայ գիտնականների թիվ մեկ խնդիրն է: Վիրտուալ գրադարանի ստեղծումը հնարավորություն կտա հայ գիտնականներին ոչ միայն ծանոթանալու համաշխարհային գիտական մտքին, այլեւ իրենց աշխատությունները ներկայացնել համաշխարհային հանրությանը: Ս. Հարությունյանն ընդգծել է, որ կատարվում են աշխատանքներ, եւ մինչեւ 2015թ. համաշխարհային գիտական գրականության 70-80%-ը հայ գիտնականներին հասանելի կդառնան:

Շնորհանդեսի ընթացքում ողջույնի խոսքով հանդես է եկել նաեւ ՀՀ-ում ԱՄՆ արտակարգ եւ լիազոր դեսպան **Ջոն Հեֆերնը**: Կարեւորելով գիտությունը եւ տեխնոլոգիական ոլորտները՝ ԱՄՆ դեսպանն իր խոսքում նշել է, որ այս ուղղությամբ նախատեսվում է զարգացնել համագործակցությունը ՀՀ ԳԱԱ-ի հետ:

«Հայկական վիրտուալ գիտական գրադարան» ծրագիրը ներառում է բաց մատչելիության սկզբունքով հրատարակված ավելի քան 3 միլիոն գիտական հոդված եւ ՄԱԿ-ի Research4Life ծրագրի ավելի քան 8 հազար ամսագիր: Ծրագրի իրականացմանն աջակցում են ԱՄՆ քաղաքացիական հետազոտությունների եւ մշակումների հիմնադրամը, ՀՀ կրթության եւ գիտության նախարարությունը, ՀՀ Գիտության պետական կոմիտեն, ՀՀ ԳԱԱ Հիմնարար գիտական գրադարանը եւ ԱՄՆ պետդեսպարտամենտը: